

आकाशवाणी जयपुर-अजमेर

प्रादेशिक समाचार

दिनांक 19.06.2024 समय: 18.45 बजे

- प्रधानमंत्री नरेन्द्र मोदी कह्यो —केन्द्र सरकार सिकल सेल री बीमारी दूर करण सारु प्रौद्योगिकी रो बत्तो ऊं बत्तो इस्तेमाल कर रही है।
- राज्यपाल कलराज मिश्र कह्यो—ए.आई. रा दौर मांय इन्सानी मूल्यां ने बचावण री मोटी चुनौती।
- अंतर्राष्ट्रीय योग दिवस रा सिलसिला मांय प्रदेश मांय जोरदार तैयारियां—योग ऊं जुड़ी संस्थावां कानी ऊं योग अभ्यास रा न्यारा—न्यारा कार्यक्रम राख्या जा रह्या है।
- प्रदेश मांय घणखर ठौड़ां तेज गर्मी अर उमस ऊं जिन्दगी माथे असर पड़्यो।

0000

प्रधानमंत्री नरेन्द्र मोदी कह्यो है के केंद्र सरकार, सिकल सेल री बीमारी ऊं जुड़ी चुनौतियां रो सामो करण सारु प्रौद्योगिकी ने बत्ती ऊं बत्ती काम ले रही है। आज विश्व सिकल सेल दिवस रे मौके प्रधानमंत्री सिकल सेल बीमारी माथे काबू करण बाबत् सरकार रो संकल्प दोहरायो। सोशल मीडिया पोस्ट रे जरिये प्रधानमंत्री कह्यो के लारला साल सरकार राष्ट्रीय सिकल सेल एनीमिया उन्मूलन मिशन सारु कीनो हो अर वा ई बारा मांय जाग जगावण, जांच रा सुबीता बधावण, बीमारी री बेगी ठा कारण अर जरूरी देखभाल समेत केई मुद्दां माथे काम कर रही है। स्वास्थ्य मंत्री जगत प्रकाश नड्डा ई कह्यो के सरकार बेगा ईलाज ने बधावो देवण, सगळां ताई ईलाज रो सुबीतो पूगावणो तैय करण अर मरीजां री देखभाल बधावण माथे खास ध्यान दे रही है। राज्य मांय ई ई बीमारी रा बारा मांय जाग जगावण सारु न्यारा—न्यारा कार्यक्रम राख्या जा रह्या है। जोधपुर एम्स रा सैटेलाइट ट्राइबल सेंटर री ओर ऊं सिकल सेल जागरुकता कैम्प लगा र वरोलिय गांव अर दानवाव रा जनजातीय सेंटर मांय ई बीमारी रा बारा मांय जाणकारी दीरीजी। 3 जुलाई ताई चलाया जावण वाळा सिकल सैल एनिमिया उन्मूलन पखवाड़ा रा तैत पाली मांय बांगड अस्पताल रा ए.एन.एम. प्रशिक्षण केन्द्र मांय जिला स्तर रो खास आयोजन राखी ज्यो। मुख्य चिकित्सा अर स्वास्थ्य अधिकारी डॉ. विकास मारवाल बतायो के आ बीमारी बच्चां, किशोरों अर बड़ां री मौत रो कारण बण सके है। वे बतायो के सिकल सेल एनिमिया बीमारी रा बारा मांय जनता मांय जाग जगावण रा मकसद ऊं सवाल—जवाब री होड़ राखी ज्यी अर जीतण वाळां ने मान—पाना दिया ज्यो।

000

राज्यपाल कलराज मिश्र कह्यो है के कृत्रिम बुद्धिमत्ता— ए आई रा दौर मांय इंसानी मूल्यां ने बचावण री मोटी चुनौती है। वे आज जयपुर मांय राजस्थान विश्वविद्यालय रा 33वां दीक्षांत समारोह मांय बोल रह्या हा। वे कह्यो के विद्यार्थियां ने पोथियां सागे परिवेश री समझ ऊं जोड़बा वाळी भणार्ई ई सार्थक है। कार्यक्रम मांय राज्यपाल सगळा विश्वविद्यालयां ने नुवी शिक्षा नीति पूरी तरह ऊं लागू करता थकां देश ने तेजी ऊं विकास रा गोला माथे ले जावण वाळा कोर्स तैयार करण बाबत् कह्यो। कार्यक्रम मांय राज्यपाल विश्वविद्यालय रा 1 लाख 66 हजार 139 विद्यार्थियां ने उपाधियां दे र नवाजा।

467 विद्यार्थियां ने पी.एच. डी. री उपाधि अर न्यारी—न्यारी परीक्षावां मांय सब ऊं बत्ता नम्बर लावण वाळा 126 विद्यार्थियां ने सोना रा तमगा दे र नवाजी ज्यो। इण ऊं पैली वे विश्वविद्यालय मांय बणायी ज्यो संविधान उद्यान जनता ने सूंप्यो।

000

आम बजट ऊं पैली आज वित्त अर कॉर्पोरेट मामलात् मंत्री निर्मला सीतारमन री सदारत मांय नई दिल्ली मांय खास अर्थशास्त्रियां सागे राय—मशविरा रा पैला दौर री मीटिंग राखी ज्यी। मीटिंग मांय केंद्रीय

वित्त राज्य मंत्री पंकज चौधरी, वित्त सचिव, आर्थिक मामलात, राजस्व, वित्तीय सेवा अर कॉर्पोरेट मामलात महकमां रा सचिव अर खास माली सलाहकार सिरकत कीनी। मुख्यमंत्री भजन लाल शर्मा ई आज वां रा दफ़तर मांय प्रदेश रो आवता माली साल रो बजट बणावण रा बारा मांय उद्योग अर सेवा हलका रा नुमाइन्दां सागे बजट ऊं पैली रो राय-मशविरो कीनो। मीटिंग मांय उद्योगां रा नुमाइन्दा टैक्स ऊं जुड़ी न्यारी-न्यारी राय दीनी।

000

चिकित्सा मंत्री गजेंद्र सिंह खींवसर आज जयपुर मांय अहलकारां सागे मीटिंग कीनी। ई पाछे खबरनवीसां सागे बातचीत करता थकां वे मौसमी अर बिरखा रे कारण व्हेवण वाळी बीमारियां ऊं जुड़ी तैयारियां रा बारा मांय जाणकारी दीनी। खींवसर कहयो के मीटिंग मांय मौसमी बीमारियां ऊं जुड़्या मौजूदा हालात अर वां री रोकथाम री तैयारियां रा बारा मांय ज़िलावार चर्चा करी ज्यी। चिकित्सा मंत्री कहयो के आयुष्मान भारत योजना बेगी ई नुवा सिरा ऊं लागू करी जावेला।

.....

000

आकाशवाणी समाचार जयपुर री ओर ऊं प्रादेशिक समाचार बुलेटिनां मांय तीन नुवा आपराधिक कानूनां रा बारा मांय जाग जगावण सारु श्रृंखला चलायी जा रही है। आज पेश है भारतीय नागरिक सुरक्षा संहिता रा एक खास प्रावधान रा बारा मांय जाणकारी-

ई संहिता री धारा 173 (1) रा तैत एफ.आई.आर. दर्ज करावण सारु पुलिस थाणा मांय जावण री जरूरत नी है। ई रा तैत इलेक्ट्रोनिक तरीका ऊं (ई-एफआईआर) रे जरिये एफ.आई.आर. दर्ज करायी जा सके है।

ई सागे ई केवल घटना रा हलका वाळा पुलिस थाणा मांय एफ.आई.आर. दर्ज करावण री शर्त खत्म कर दीरीजी है। ई पाछे देश रा किण ई पुलिस थाणा मांय एफ.आई.आर. दर्ज करायी जा सके है। महिलावां रे खिलाफ व्हेवण वाळा कुछ अपराधां मांय एफ.आई.आर. पुलिस री महिला अहलकार कानी ऊं दर्ज करणो ज़रूरी कर दियो ज्यो है। पीड़ित महिला रे अस्थायी या स्थायी तौर ऊं दिमागी तौर ऊं या शरीर ऊं अक्षम व्हेवण रा हालात मांय एफ.आई.आर पीड़ित महिला रा घर माथे दर्ज करण रो प्रावधान ई करी ज्यो है।

0000

प्रदेश मांय अंतर्राष्ट्रीय योग दिवस री जोरदार तैयारियां करी जा रही है। योग संस्थानां कानी ऊं जिलां मांय योग अभ्यास रा कार्यक्रम राख्या जा रह्या है। जिला प्रशासन अर आयुर्वेद विभाग री ओर ऊं ई योग रा बारा मांय जाग जगावण सारु आयोजन राख्या जा रह्या है। सवाईमाधोपुर मांय जिला कलेक्टर डॉ. खुशाल यादव आयुर्वेद, परिवहन, नगर परिषद अर चिकित्सा अर स्वास्थ्य विभाग समेत न्यारा-न्यारा महकमां रा अहलकारां री मीटिंग ले र योगाभ्यास री ठौड़ां माकूल व्यवस्थावां करण रा हुकम दीना। जिला मुख्यालय रा महावीर पार्क समेत न्यारी-न्यारी ठौड़ां योग अभ्यास रा कार्यक्रम राख्या जा रह्या है, ज्यां मांय हर उम्र रा लोग सिरकत कर रह्या है। बाड़मेर रा आदर्श स्टेडियम मांय जिला स्तर रो कार्यक्रम व्हेला। योग दिवस कार्यक्रम मांय योगासनां ऊं जुड़्या फोटूआं री प्रदर्शनी ई लगायी जावेला। वठे आदर्श स्टेडियम मांय 6 जून ऊं लगातार योगाभ्यास रा कार्यक्रम राख्या रह्या है। जैसलमेर मांय बी.एस.एफ़ री 108 वीं बटालियन रा अहलकार अर जवान सम रा रेतीला धोरां मांय योगाभ्यास कीनो। बूंदी मांय अंतरराष्ट्रीय योग दिवस मनावण री तैयारियां रो जायज़ो लेवण सारु जिला कलेक्टर अक्षय गोदारा री सदारत मांय जिला स्तर रा अहलकारां अर योग ऊं जुड़्या सामाजिक संगठनां रा नुमाइंदां री मीटिंग राख्यी ज्यी। योग दिवस री पैली वाळी सांझ काल बूंदी मांय योग ऊं जुड़ी सांस्कृतिक संध्या राख्यी जावेला। भीलवाड़ा मांय ई जिला स्तर रा अहलकारां री मीटिंग मांय अन्तर्राष्ट्रीय योग दिवस मनावण री तैयारियां रो जायज़ो लियो ज्यो। बांसवाड़ा मांय संभागीय आयुक्त डॉ. नीरज के पवन योग दिवस पोस्टर रो विमोचन कीनो।

000

देश मांय पड़ रही जोरदार गर्मी रे कारण बिजली री बधती मांग ने ध्यान राखता थकां कोयला मंत्रालय देश रा ताप बिजलीघरां मांय कोयला री ज़रूरी पूर्ति तैय कर रहयो है। प्रदेश मांय घणखर ठौड़ां तेज़ गर्मी अर उमस ऊं घणी परेशानी व्हे रही है। जैसलमेर, बीकानेर, जयपुर,

शाहपुरा ,कोटपूतली अरु सवाईमाधोपुर समेत न्यारी—न्यारी ठौड़ां घणी गर्मी पड़ रही है। जयपुर ग्रामीण समेत केई हलकां मांय रात मांय ई तेज गर्मी रही। मौसम विभाग जयपुर, कोटा, भरतपुर अरु बीकानेर संभाग मांय आवता 48 घंटां मांय कठे—कठे हल्की बिरखा रा आसार जताया है।

000

चौमासा री सरुआत ऊं पैली भरतपुर रा केवलादेव राष्ट्रीय पक्षी अभ्यारण्य मांय परिंदा आशियाना बणावण लाग्या है। म्हाणा खबरनवीस बतायो के उद्यान मांय चौमासा री रूत मांय न्यारी—न्यारी प्रजातियां रा परिंदा वंश मांय बधोतरी करे है।

.....

000